

四庫全書

子部

欽定四庫全書

子部
稗編卷五十六

詳校官中書臣賈鉞

主事臣祁韻士覆勘

總校官中書臣朱鈴

校對官庶吉士臣何思鈞

謄錄監生臣張元信

欽定四庫全書

稗編卷五十六

明 唐順之 撰

諸家十四地理

叙河水所經

及河南北諸水出入

桑

欽 後同

崑崙墟在西北去嵩高五萬里地之中也其高萬一千
里河水出其東北陬屈從其東南流入於渤海河水又
南入慈嶺山河水又西逕蜀賓國北河水又西逕月氏
國南又西逕安息南河水與蜺羅跂締水同注蒼海又

西逕四大塔北又西逕陀衛國北河水又東逕皮山國北其源出于闐國南山北流與葱嶺河合東注蒲昌海河水又東與于闐河合南源導于闐南山俗謂之仇摩置自置北流逕于闐國西治西城土多玉石西去皮山三百八十里東去陽關五千餘里釋法顯自烏帝西南行路中無人民沙行艱難所逕之苦人理莫比在道一月五日得達于闐其國殷庶民篤信多大乘學威儀齊整器鉢無聲城南一十五里有刹寺中有石鞞石

上有足跡彼俗言是辟支佛跡法顯所不傳疑非佛跡也又西北流注于河南河又東逕于闐北南河又東北逕扞彌國北南河又東逕且末國北北河又東北流分為二水枝流出焉北河自疎勒逕流南河之北北河又東逕莎車國南北河之東南逕溫宿國北河又東逕姑墨國南河水又東逕注賓城南又東逕樓蘭城南而東注河水又東注于沕澤又東入塞過敦煌酒泉張掖郡南河水又自東河曲逕西海郡南河水又東逕允川而

歷大榆小榆谷北又東過隴西河關縣北洮水從東南來注之河水又東北流入西卑郡界左合二川南流入河又東北濟川水注之河水又東逕澆河故城北河水又東北逕黃川城河水又東逕石城南左合北谷水河水又東北逕黃河城南河水又東北逕廣違城北右合烏頭川水河水又東逕邯川城南河水又東臨津溪水注之河水又東逕臨津城北白土城南河水又東左會白土川水河水又東北會兩川右合二水河水又東得

野亭南河水又東歷鳳林北河水又東與灤水合河水
又逕左南城南大河又東逕赤岸北河水又東洮水注
之又東過金城允吾縣北河水又東逕石城南又東過
榆中縣北又東過天水北界又北過武威媼圍縣東北
又東北過天水勇士縣北又東北過安定北界麥田山
河水東北流逕安定祖厲縣故城西北河水又東北逕
麥田城西又北與麥田泉水合河水又東北逕麥田山
西河水又東北逕于黑城北又東北高平川水注之河

水又東北逕昫卷縣故城西河水又北過北地富平縣
西河水又北逕富平縣故城西河水又北逕簿骨律鎮
城河水又逕典農城東河水又北逕典農城東河水又
東北逕廉縣故城東河水又與北枝津合河水又東
北逕渾懷鄣西河水又東北厯石崖山西又北過朔方
臨戎縣西河水又北逕臨戎縣故城西河水又北有枝
渠東出謂之銅口東逕沃野故城南

漢武帝元狩三年
立王莽之綏武也

枝渠東注以溉田
所謂智通在我矣

河水又北屈而為南河出焉河水又

北迤西溢於窳渾縣故城東河水又屈而東流為北河
東逕高闕南河水自臨河縣東逕陽山南河水又南逕
馬陰山西河水又東南逕朔方縣故城東北河水自朔
方東轉逕渠搜縣故城北河水又東逕成宜縣故城南
河水又東逕原亭城南河水又東逕宜梁縣之故城南
河水又東逕副陽城南又東過臨沃縣南河水又東枝
津出焉河水又東流石門水南注之河水又東逕固陽
縣故城南河水又東逕塞泉城南而東注又東過雲中

楨陵縣南又東過沙南縣北從縣東屈南過沙陵縣西
河水屈而南流白渠水注之河水南入楨陵縣西北又
南過赤城東又南過定襄桐過縣西河水於二縣之間
濟有君子之名河水又東南左合一水河水又南樹頽
水注之河水又南太羅水注之河水又左得湍水口又
南過西河圖銀陽縣東河水又東端水入焉河水又南
諸次之水入焉河水又南湯水注之又南離石縣西奢
延水注之河水又南陵水注之河水又南得離石水口

又南過中陽縣西中南縣故城在東東翼汾水隔越重
山又南過土軍縣西河水又南合契水河水又南得大
蛇水河水又南右納辱水又南過上郡高奴縣東河水
又南蒲川石樓山南逕蒲城東河水又南過河東北屈
縣西河水又南得鯉魚澗河水又南羊求水入焉河水
又南為採桑津又南過皮氏縣西河水又南合蒲水河
水又南丹水西南河水又南黑水河水又南至嶧谷傍
河水又南洛水自獵山枝分東派東南注于河又南出

龍門口汾水從東來注之河水又南右合暢谷水河水
又南逕梁山原東河水又南崕谷水注之河水又南右
合陶渠水河水又南徐水注之河水又南逕子夏石室
又南過汾陰縣西河水又逕郃陽城東河水又南逕陶
城西又南過蒲坂縣西河水南逕雷首山西又南凍水
注之又南至華陰潼關渭水從西來注之河水厯船司
空與渭水會河水又東北玉澗水注之河水又東逕閿
鄉城北東與全鳩澗水合又東過河北縣南河水又東

永樂澗水注之河水自河北城南東逕芮城河水又會
槃澗河水又東逕湖縣故城北河水又東合栢谷水河
水又東右合門水又東過陝縣北又西逕陝縣故城南
又東過大陽縣南河水又東逕大陽縣故城南河水又
東沙澗水注之又東過砥柱間河之右側嶠水注之河
水又東千嶠之水注焉又東過平陰縣北又東至鄧清
水從西北來注之河水又東與教水合河水又與畛水
合河水又東合庸庸之水河水又東逕平陰縣北河水

西會瀑水

一作右會

河水又東過平縣北湛水從北來注之

河水又東逕河陽縣故城南河水又逕臨平亭北河水又東逕洛陽縣北河水又東逕平縣故城北河水又東淇水入焉又東沛水注焉又東過鞏縣北洛水從縣西北流注之又東過成皋縣北濟水從北來注之河水又逕黃馬坂北河水又東逕旋門坂北河水東逕成皋大伾山下河水南對玉門河水又東合汜水河水又東逕板城北河水又東逕五龍塢北又東過滎陽縣蒗蕩渠

出焉河水又東北逕卷之扈亭北河水又東逕八激堤
北河水又東逕卷縣北河水又東北逕赤岸固北而東
北注之又東北過武德縣東沁水從之東至酸棗縣西
濮水東出焉河水又東北通謂之延津河水又逕東燕
縣故城北則有濟水自北來注之河水又東淇水入焉
又東逕遮害亭南河水又右逕滑臺城又東北過黎陽
縣南河水自津東北逕涼城縣河水又東北逕伍子胥
廟南河水又東北為長壽津故瀆東北逕戚城西故瀆

又逕繁陽縣故城東北逕陰安縣故城西故瀆又東北逕昌樂縣故城東故瀆又東北逕平邑郭西又東北逕元城縣故城西北面至沙丘堰至于大陸北播于九河之故瀆自沙丘堰南分屯氏河出焉河水故瀆東北逕發干縣北城西又屈逕其北大河故瀆又東逕貝丘縣故城南大河故瀆又東逕甘陵縣故城南大河故瀆又東逕平原縣故城西而北絕屯氏三瀆北逕繹幕縣故城東北西流平原禹縣故城西大河故瀆又北逕脩

縣故城東又北逕安陵縣西大河故瀆北出為屯氏河
逕館陶縣東東北出左瀆又北逕經城東繚城西又逕
南宮縣西北注絳瀆右瀆又東北逕廣宗縣故城南又
東北逕界城亭北又東北逕長樂郡武彊縣故城東又
東北逕廣川縣與絳瀆水故道合又東北逕廣川縣故
城西又東逕棘津亭南張甲故瀆又東北至脩縣東會
清河屯氏別河東枝津出焉東逕信成縣故城南又東
逕青陽縣故城南清河郡北又東北逕陵鄉南又東北

逕東武城縣故城南又東北逕東陽縣故城南屯氏別河又東北逕清河郡南又東北逕清河故城西屯氏別河北瀆東逕繹幕縣故城南東絕大河故瀆又東北逕平原縣枝津北出至安陵縣遂絕屯氏別河北瀆又東北逕重平縣故城南屯氏別河北瀆又東入陽信縣今無水又東為咸河東北流逕陽信縣故城北屯氏別河南瀆自平原東絕大河故瀆又逕平原縣故城北東北枝津右出東北至安德縣界東會商河屯氏別河南瀆

又東北於平原界又有枝渠右出至安德縣遂絕屯氏
別河南瀆自平原城北首受大河故瀆東出亦通謂之
篤馬河東北逕安德縣故城西又東北逕臨齊城南始
又屈逕其城東故瀆廣四十步又東北逕重丘縣故城
西又東北逕西平昌縣故城北又逕般縣故城北東逕
樂陵縣故城北又東北逕陽信縣故城南東北入海屯
氏河故瀆自別河東逕甘陵之信鄉縣故城南屯氏故
瀆又東逕甘陵縣故城北又東逕靈縣北又東北逕鄒

縣與鳴犢河故瀆合上承大河故瀆於靈縣南東北逕
靈縣東東入鄒縣而北合屯氏瀆屯氏瀆兼鳴犢之稱
也又東逕鄒縣城北東北合大河故瀆謂之鳴犢口十
三州志曰鳴犢河東北至菑入屯氏考瀆則不至也又
東北過衛國縣南又東北過濮陽縣北瓠子河出焉
河水東逕鐵丘南河水東北流而逕濮陽縣北為濮陽
津河水又東北逕衛國縣南東為鄆口津河水又東逕
鄆城縣北一作國口河水又東北逕范縣之秦亭西河水又

東北逕委粟津左會浮水故瀆故瀆東絕大河故瀆東
逕五鹿之野浮水故瀆又東南逕衛國邑又東逕衛國
縣故城南古斟觀浮水故瀆又東逕河牧城而東北出
又東北入東武陽縣東入河又有漯水出焉河水又東
逕武陽東范縣西而東北流也又東北過東阿縣北河
水於范縣東北流為倉亭津河水又歷柯澤逕東阿縣
故城西而東北出流注又東北過茌平縣西河自鄧里
渠東北逕昌鄉亭北逕礪礪城西河水又與鄧里渠水

上承大河於東阿縣西東逕東阿縣故城北又東北逕臨邑與將渠合又北逕荏平縣東臨邑縣故城西北流入於河河水又東北流四瀆津又東北過高唐縣界

漯水又東北逕清河縣故城北漯水又東北逕文鄉城東南又東北博平縣又與黃溝同注川澤又東逕文鄉城又東南逕王城北黃溝又東北逕左與漯水隱覆勢鎮河陸東出於高唐縣大河又迤東注漯水矣漯水又東北逕援縣故城西漯水又逕高唐縣故城東漯水又

北逕漂陰縣故城北漂水又東北逕著縣故城南又東
北逕崔氏城北漂水東南逕東朝陽縣故城南漂水又
東逕漢徵君伏生墓南漂水又東北逕建信縣故城北
漂水又東北逕千乘縣二城間又東北為馬常坑又東
北過楊墟縣東商河出焉商河又北逕平原縣東又逕
安德縣故城南又東北逕昌平縣故城南又東逕般縣
故城南又東逕樂陵縣故城南商河又東逕朮鄉縣故
城南沙溝水注之商河又東北流逕馬嶺城西北而流

屈而東注南轉逕城東商河又東北逕富城縣故城北
商河又分為二水南水謂之長叢溝北水世又謂之百
薄瀆大河又東北逕高唐縣故城西大河又北逕張公
城臨側河湄河水又北逕平原縣故城東大河右溢世
謂之甘棗溝故溝又東北歷長堤逕漯陰縣北河水又
東北逕陽阿縣故城西又東北過漯陽縣北河水自平
原左逕安德城東而北為鹿角津東北逕般縣樂陵朮
鄉至厭次縣故城南為厭次河河水又逕漯陰縣故城

北一作逕河水又東北為漯沃津河水又東逕千乘城北

又東北過黎城縣北又東北過甲下邑濟水從西來注之又東北入于海河水又東分為二水枝津東逕甲下城南東南歷馬常坑注濟

汾水出太原汾縣陽北管涔山東南過晉陽縣東晉水從縣南東流注之又南洞過水從東來注之又南過大陵縣東又南過平陶縣東文水從西來流注又南過冠爵津一作冠又南入河東界又南過永安縣西又南過楊

縣東西南過高梁邑西又南過平陽縣東又南過臨汾縣東又屈從縣南西流又西過長脩縣南又西過皮氏縣南又西至汾陰縣北西注于河

澮水出河東絳縣東澮交東高山西過其縣南又西南過虓祁宮南又西至王澤注于汾水

涑水出河東聞喜縣東山黍葭谷又西過周陽邑南又西南過左邑縣南又西南過安邑縣西又南過解縣東又西南注于張陽池

文水出大陵縣西山文谷東到其縣屈南到平陶縣東北東入于汾

原公水出茲氏縣西羊頭山東過其縣北又東入于汾洞過水出沾縣北山西過榆次縣南又西到晉陽縣南西入于汾出晉水下口者也

晉水出晉陽縣西懸甕山又東過其縣南又東入于汾水

湛水出河內軹縣西北山東過其縣北又東過波縣之

北又東過母辟邑南又東南當平縣之東北南入于河
濟水出河東垣縣東王屋山為沆水又東至溫縣西北
為濟水又東過其縣北屈從縣東南流過隕城西又南
當鞏縣北南入于河與河合流又東過城皋縣北又東
過滎陽縣北又東至礪磳南東出過滎澤北濟水又東
逕西廣武城北濟水又東逕東廣武城北濟水又東逕
敖山北濟水又東合滎瀆濟水又東逕滎陽北濟水又
東礪石溪水注之濟水又東索水注之又東過陽武縣

南濟水又東北流南濟也逕陽武縣故城南濟水又東逕封丘縣南濟水又東逕東昏縣故城北濟水又東逕濟陽縣故城南又東過封丘縣北北濟也濟水又東逕原武縣故城南濟瀆又東逕酸棗縣之烏巢澤北又東過平丘縣南北濟也又東過濟陽縣北濟也又東過宛朐縣南又東過定陶縣南南濟也濟水又東北荷水東出焉濟水又東逕秦相魏冉冢濟水又東北逕定陶恭王陵南濟水又東北逕定陶縣故城南又屈從縣東北

流南濟也濟水又東至乘氏縣西分為二南為荷水北
為濟瀆北濟又東北逕宛昫縣故城北又東北與濮水
濟水故瀆又北右合洪水又東北過壽張縣西界安民
亭南汶水從東北來注之濟水又北逕須昫城西濟水
又逕微鄉東又北過須昌縣西濟水又北逕漁山東左
合馬頰水濟水自魚山北逕清亭東又北過穀城縣西
濟水又北逕周首亭西又北過臨邑縣東濟水又北逕
平陰城西濟水又東北至垣菑城西又東北過廬縣北

濟水又逕盧縣故城北濟水又東北與中川水合濟水
又東北右會玉水濟水又東北灤水出焉濟水又東北
華不注山又東北過臺縣北濟水又東北合芹溝水又
東北過管縣南又東過梁鄒縣北又東北過臨濟縣南
濟水又東北迤為淵渚謂之平州濟水又東北逕樂安
縣故城南又東北過利縣西又東北過甲下邑入于河
又東北入海其一水東流者過乘氏縣南又東過昌邑
縣北又東過金鄉縣南又東過東緡縣北濟水又東逕

漢平狄將軍扶溝侯淮揚朱鮪冢又東過方與縣為荷
水濟水東逕重鄉城南荷水又東過湖陸縣南東入于
泗水又東南過沛縣東北又東南過留縣北又東過彭
城縣北睢水從西來注之濟水又南逕彭城縣故城東
又東南過徐縣北又東至下邳睢陵縣南入于淮

清水出河內修武縣之北黑山東北過獲嘉縣北又東
過汲縣北又東入于河

沁水出上黨涅縣謁戾山南過穀遠縣東又南過猗氏

縣東又南過陽阿縣東又南出山過沁水縣北又東過
野王縣北又東過州縣北又東過邢丘一曰懷縣之北
又東過武德縣南又東南至滎陽縣北東入于河

淇水出河內隆慮縣西大號山又東過內黃縣南為白
溝屈從縣東北與洹水合又東北過館陶縣北又東北
過清淵縣西又東北過廣宗縣東為河清又東北過東
武城縣西又北過廣川縣東又東過蔣縣南又東北過
東光縣西又東北過南皮縣西又東北過浮陽縣西又

東北過濊邑北又東北過鄉邑南又東北過窮河邑南
又東北過漂榆邑入于海

蕩水出河內陰縣西山東又東北至內黃縣入于黃澤
洹水出上黨洹氏縣東過隆慮縣北又東北出山逕鄴
縣南又東過內黃縣北東入于白溝

濁漳水出上黨長子縣西發鳩山之漳水焉東過其縣
南屈從縣東北流注又東過壺關縣北又東北過屯留
縣潞縣北又東過武安縣又東出山過鄴縣西又東過

列人縣南又東北過斥漳縣南又東北過曲周縣東又東北過鉅鹿縣東又北過堂陽縣西又東北過扶柳縣北又東北過信都縣西又東北過下博縣之西又東北過阜城縣北又東北至昌亭與滹沱河會又東北至樂城陵縣別出北又東北過成平縣南合清河又東北過章武縣西又東北過平舒縣南東入海

清漳水出上黨沾縣西北少山大要谷南過縣西又從縣南屈東過涉縣西屈從縣南東至武安縣南黍害邑

入于濁漳

易水出涿郡故安縣閭鄉西山東過范陽縣南又東過容城縣南又東過安次縣南又東過泉州縣南東入于海

滏水出代郡靈丘縣高氏山東南過廣昌縣南又東南過中山上曲陽縣北恒水從西來注之又東過唐縣南又東過安喜縣南又東過安國縣北又東過博陵縣定州博野南又東北入于易

聖水出上谷東過良鄉縣南又東過良鄉縣北又東過安次縣南東入于海

巨馬河出代郡廣昌縣涑山東過迺縣北又東南過容城縣北又東南至泉州縣西南東入八丈溝又南又東過渤海東平舒縣北東入于海

濕水出雁門陰館縣東北過代郡桑乾縣南又東過涿鹿縣北又東南出山過廣陽薊縣北又東至漁陽雍奴縣西入筍溝

濕餘水出上谷居庸關東又東流過軍都縣南又東流過薊縣北又北屈東南至狐奴縣西入于沽河

沽河從塞外來南過漁陽狐奴縣北西南與濕餘水合為潞河又東南至雍奴縣西筭溝又東南至泉州縣與清河合東入于海清河者派河尾也

鮑丘水從塞外來南過漁陽縣東又南過潞縣西又南至雍奴縣北屈東入于海

濡水從塞外來東南過遼西今支縣北又東南過海陽

縣西南入于海

大遼水出塞外衛白平山東南入塞過遼東襄平縣西
又東南過房縣西又東過安市縣西南入于海又玄菟
高句麗縣有遼山

小遼水所出西南至遼遂縣入于大遼水也

涓水出樂浪鏤方縣東南過于臨涓縣東入于海

洛水出京兆上洛縣謹舉山洛水又東尸水注之洛水
又東得乳水洛水又東會于龍餘之水洛水又東門水

出焉洛水又東逕熊耳山北東北過盧氏縣南洛水逕陽渠關北洛水又東逕盧氏縣故城南洛水東與高門水合洛水又東松陽溪水注之洛水又東庫谷水注之又東北過蠡城邑之南又東過陽市邑南又東北過于父邑之南洛水又東渠谷又東北宜陽縣南洛水又東逕宜陽縣故城南又東北出散關南洛水又東枝瀆左出焉又東北過河南縣南又東過洛陽縣南伊水從西來注之又東過偃師縣南洛水又北陽渠水注之洛水

又東逕訾城北又東羅水注之又東北過鞏縣東又北入于河洛水又東北流入于河

伊水出南陽西荀渠山東北過郭落山又東北過陸渾縣南又東北過新城縣南又東北過伊闕中又東北至洛陽南北入于洛

瀍水出河南穀城縣北山東與千金渠合又東過洛陽縣南又東過偃師縣又東入于洛

澗水出新安縣南白石山東南入于洛

穀水出弘農黽池縣南墻塚林穀陽谷東北過穀城縣北又東過河南縣北東南入于洛

甘水出弘農宜陽縣鹿蹄山東北至河南縣南北入于洛

漆水出扶風杜陽縣俞山東北入于渭

澹水出京兆藍田谷北入于灊

沮水出北地直路縣東過馮翊祿祿縣北東入于洛

渭水出隴西首陽縣渭谷亭南烏鼠山東北過襄武縣

北又東過獮道縣南又東過冀縣北又東過上邽縣又東過陳倉縣西又東逕武功縣又東芒水從南來流注之渭水又東過槐里縣南又東澇水從南來注之渭水又東北逕黃山官南就水注之渭水又東合田溪水渭水又東逕槐里縣故地南渭水又東合甘水又東豐水從南來注之渭水又東北與鎬水合渭水又東北逕渭城南而沈水注之又東過長安縣北渭水又東與沈水枝津合渭水又逕長安城北又東過華陰縣北又東過

鄭縣北又東過灊陵縣北霸水從縣西北流注之東入于河

漾水出隴西氐道縣嶓冢山東至武都沮縣為漢水又東南至廣魏白水縣西又東南至葭萌縣東北與羌水合又東南過巴郡閬中縣又東南入漢州江津縣東南入于江

丹水出京兆上洛縣西北冢嶺山東南過其縣南又東南過商縣南又東南至丹水縣入于汧浙

汝水出河南梁縣勉鄉西天息山東南過其縣北又東南潁川潁縣南又東南過定陵縣北又東南過鄆縣北又東南過汝南上蔡縣西又東南過平輿縣一作平輿又東至原鹿縣南入于淮

潁水出潁川陽城縣西北少室山又東南過其縣南又東南過陽翟縣北又東南過潁陽縣西又東南過潁陰縣西南又東南至慎縣東南入于淮又東南過臨潁縣南又東過汝南隱強縣北洧水從河南密縣東流注之

又東過西華縣北又南過汝陽縣北又東南過南頓縣
北潁水從西來流注之又東南至新陽縣北蒗蕩渠水
從西北來注之

洧水出河南密縣西南馬領山又東南過長杜縣南又
東過鄭縣南鄆水從西北來注之又東南過長社縣北
又東南過新汲縣東北又東南過茅城邑之東北又東
過習陽城西折入于潁

潁水出河南密縣大騄山東南入于潁

潞水出鄭縣西北平地東過其縣北又東南過其縣東
又南入于洧水

渠水出滎陽北河東南過中牟縣之北又東至浚儀縣
又屈南至扶溝縣北其一者東南過陳縣北又東南汝
南新陽縣北又東南過山桑縣北又東南過龍亢縣南
又東南過義城縣西南入于淮

陰溝水出河南陽武縣蒗蕩渠東南至沛為過水又東
南至下邳淮陵縣入于淮

汭水出陰溝于浚儀縣北又東至梁郡蒙縣為獲水餘波南入睢陽城中

獲水出汭水於梁郡蒙縣北又東過蕭縣南又東至彭城縣北東入于泗

睢水出梁郡鄆縣東過睢陽縣南又東過相縣南屈從城北東流當蕭縣南入于睢

瓠子河出東郡濮陽縣北河東至濟陰句縣為新溝又東北過廩丘縣為濮水又北過東郡范縣東北為濟渠

與將渠合又東北過東阿縣東又東北過臨邑縣西又東北過茌平縣東為鄧里渠又東北過祝阿縣為濟渠又東北至梁鄒縣西分為二其東北者為濟河其東者為時水又東北至濟西濟河東北入于海時水東至臨淄縣西屈南過泰山華縣東又南至費縣東入于沂

汶水出泰山萊蕪縣原山西南過嬴縣南又西南過奉高縣北屈從縣西南流過博縣西北又西南過蛇丘縣南又西南過岡縣北定陶東北又西南過平章縣南又

西南過無鹽縣南又西南過壽張縣北又西南至安民
亭入于濟

泗水出魯下縣北山西南逕魯縣北又西過瑕丘縣東
屈從縣東南流潞水從東來注之又南過平陽縣西又
南過高平縣西洸水從西北來流注之又南過方與縣
東

菏水從西來注之又屈東南過湖陸縣南洧水從東
北來流注之又東過沛縣東又東逕山陽郡又東南過

彭城縣東北又東南過呂縣南又東南過下邳縣西又東南入于淮

沂水出泰山蓋縣艾山南過琅邪臨沂縣東又南過開陽縣東又東過襄贛縣東屈從縣南西流又屈南過剡縣西又南過良城縣西又南過下邳縣西南入于泗
洙水出泰山蓋縣臨樂山西南至卞縣入于泗

沐水出琅耶東莞縣西北山東南過其縣東又東南過莒縣東又南過陽都縣東入于沂

巨洋水出朱虛縣泰山北過其縣西又北過臨朐縣東
又北過劇縣西又東北過壽光縣西又東北入于海

淄水出泰山萊蕪縣原山又東北過臨淄縣東又東過
利縣東又東北入于海

汝水出朱虛縣泰山北過其縣東又北過淳于縣西
又東北入于濰

濰水出琅邪箕縣濰山東北過東武城縣西又北過平
昌縣東又北過高密縣西又北過淳于縣東又東北逕

都昌縣東又東北入于海

膠水出黔陬縣膠山北過其縣西又北過夷安縣東又北過當利縣西北入于海

沔水出武都沮縣東狼谷中沔水又東南逕沮水戍而東南流注漢曰沮口沔水又東逕白馬戍南瀼水入焉沔水又東逕武侯壘南又東逕沔陽故城南沔水又東逕西樂城北漢水又左得度口水漢水又東黃沙水左注之漢水又東合褒水漢水又東逕漢廟堆下又東過

南鄭縣南漢水又東得長柳度漢水又左會文水漢水
又東黑水注之又東過城固縣南又東過魏興安陽縣
南沔水出自旱山北注之漢水又東至漢城南與駱谷
水合漢水又東逕小城固南漢水又東逕石門灘漢水
又東逕媯墟灘漢水又東逕猴徑灘漢水又東逕小大
黃金南漢水又東合蘧蔭谿口漢水又東右會洋水漢
水又東歷教頭漢水又東合直水漢水又東逕直城南
漢水又東逕晉昌郡之寧都縣南漢水又東逕魚脯溪

口又東過西城縣南漢水又東右得大勢漢水又對月
谷口漢水又東逕西城縣故城南漢水又東為鱸湍漢
水又東合洵水漢水又東逕木蘭寨南漢水又東左得
育溪漢水又東逕魏興郡之錫縣故城北漢水又東厯
姚方沔水又東過襄陽縣北沔水又東合檀溪水沔水
又逕平魯城南又從縣東屈西南涓水從北來注之沔
水中有魚梁洲沔水又逕桃林亭東沔水又東南逕蔡
洲沔水又東南邑城北沔水又東合洞口又東過中盧

縣東沔水又東南流逕犂丘故城西又南過郢

一作縣印

東北沔水又南得木里水會又南過宜城縣東夷水出

自房陵縣東流注之沔水又逕都縣故城南沔水又東

教水注之沔水又東南與白水合沔水自荆城東南流

逕當陽縣之章山東沔水又東右會權口沔水又東南

與陽口合又東南逕江夏雲杜縣東夏水從西來注之

沔水又東逕左桑沔水又東合巨亮水口沔水又東得

合驛口沔水又東謂之橫桑沔水又東謂之鄭潭沔水

又東得死沔沔水又東與力口合沔水又東南湏水入
焉沔水又東逕沌陽縣北又南至江夏沙羨縣北南入
于江沔水與江合流又東過彭蠡澤又東北出居巢縣
南又東過牛渚縣南又東至石城縣分為二其一東北
流其一又過毗陵縣北為北江南江又東與貴長池水
合南江又東逕宣城之臨城縣南南江又東與桐水合
南江又東逕寧國縣南南江又東北為長瀆歷河口東
則松江出焉江水奇分謂之三江口又東至會稽餘姚

縣東入于海江水又東逕黃橋下江水又東逕餘姚縣故城南江水又東注于海又東過堵陽縣堵水出焉自上粉縣北流注之又東過鄖鄉縣南漢水又東逕鄖陽縣故城南漢水又東逕琵琶谷口又東北流又屈東南過武當縣東北漢水又東為猥子潭漢水又東南逕武當縣故城北漢水又東平陽川水注之沔水又東南逕縣城東沔水又東逕龍巢山下又東南逕涉都縣東北又東南過鄮縣之西南又南逕穀城東又南過陰縣之

西沔水又東南得洛溪口又南過筑陽東筑水出自房陵縣東過其縣南流注之又東逕學城南沔水又南逕筑城縣東沔水又東為漆灘又東過山都縣東北沔水又東逕樂山北沔水又東逕隆中

潛水出巴郡宕渠縣又南入于江

湍水出酈縣北芬山南流過其縣東又南過冠軍縣東又東過白牛邑南又東南至新野縣東入于涓

均水出析縣北山南流過其縣之東又南當涉都縣邑

北南入于沔

粉水出房陵縣東流過郢邑南又東過穀邑南東入于沔

白水出朝陽縣西東流過其縣南又東至新野縣西東入于沔

泚水出泚陽東北太湖山東南流逕其縣南泄水從南來注之又西至新野縣南入于沔

淮水出南陽平氏縣胎簪山東北過桐柏山淮水又

東逕義陽縣淮水又逕義陽縣故城南淮水又東得澗
口水東過江夏平春縣北淮水又東油水注之淮水又
東北與大木水合淮水又東北流左會湖水淮水又東
逕安陽縣故城南又東逕新息縣南淮水又東逕浮光
山北淮水又東右壑水淮水又東北申陂枝水注之淮
水又東逕淮陰亭北又東逕白城南淮水又東逕長陵
戍南又東青陂水注之淮水又東北合黃水又東過期
思縣北淮水又東北淠一作淠水注之東過鹿縣南汝水

從西北來注之又東過廬江安豐縣東北決水從北來注之淮水又東谷水入焉淮水又東北左會潤水淮水又東北窮水入焉又東北至九江壽春縣西泄水泄水合北注之又東潁水從西北來流注之淮水又東流與潁口會東南逕倉陵北又東北流逕壽春縣故城西淮水又北左合椒水又東過壽春縣北肥水從縣東北流注之淮水又北逕山碇中謂之碇石淮水又北逕莫耶山西又東過當塗縣北渦水從西北來注之淮水又東

北濠水注之淮水又北沙水注之又東過鍾離縣北淮
水又東逕夏丘縣南淮水又東逕浮山淮水又東逕徐
縣南歷澗水注之淮水又東池水注之淮水又東靳水
注之淮水又東歷客山逕盱眙縣故城西又東北至下
邳淮陰縣西泗水從西北來流注之又東過淮陰縣北
中瀆水出白馬湖東北注之又東兩小水流注之又東
至廣陵淮浦縣入于海

渰水出南陽魯陽縣西之堯山東北過潁川定陵縣西

北又東過鄆縣南東入于汝

涓水出弘農盧氏縣支離山東南過南陽西鄂縣西北
又東過宛縣南又屈南過滎陽縣東又南過新野縣西
西過鄧縣東南入于沔

潁水出潁強縣南澤中東入潁

濯水出汝南吳房縣西北與山東過其縣北入于汝

潁水出滎陰縣東上界山東過吳房縣南又東過濯陽
縣南又東過上蔡縣南東入汝

蕪水出蕪陰縣西北扶予山東過其縣南又東過西平縣北又東過鄆縣南又東過定潁縣北東入于汝

潁水出蔡陽縣東南逕隋縣西又南過江夏安陸縣西又東南入于夏

潒水出江夏平春縣西南過安陸入于潁

蘄水出江夏蘄春縣北山南過其縣西又南至蘄口南入于江

決水出廬江雩婁縣南大別山北過其縣東又北過安

豐縣東又北入于淮

沘水出盧江潛縣南西霍山東北東北過六縣東北入于淮

泄水出博安縣北過芍陂西與沘水合西北入于淮
肥水出九江成德縣廣陽鄉西肥水別北過其縣西北入芍陂又北過壽春縣東北入于淮

施水亦從廣陽鄉東南入于湖

沮水出漢中房陵縣淮水東南過臨沮縣界又東南過

枝江縣東南入于江

漳水出臨沮縣東荆山東南過蓼亭又東過章鄉南又南至枝江縣北烏扶邑入于沮

夏水出江津于江陵縣東南又東過華容縣南又東至江夏雲杜縣入于沔

羌水出羌參糧又東南至廣魏白水縣與漢水合又東南過巴郡閬中縣又南至墊江縣東南入于江
涪水出廣魏涪縣西北南至小廣魏與梓潼合

梓潼水出其縣北界西南入于涪又西南至小廣魏縣南入于墊江

涪水出漢中南鄭縣東南旱山北至安陽縣南入于沔

叙江水所經

及江以南諸水出入

岷山在蜀郡氐道縣大江所出東南過其縣北

江水自天彭關東逕汶關而歷氐道縣北又有湍水入

焉江水又東別為沱江水又歷都安縣又東南過犍為

武陽縣青衣水沫水從西南來合而注之又東南過犍

道縣北若水淹水合從西來注之又東渚水北流注之
江水又與符黑水合又東過江陽縣南洛水從三危山
東過廣魏洛陽南東南注之江水逕漢安縣北江水東
逕樊石灘又逕大附灘又東過符縣北邪東南鰓部水
從符關東北注之又東北至巴郡江州縣東强水涪水
漢水白水宕渠水五水合南流注之又江水東至枳縣
西延江從牂牁郡北流西屈注之又逕東望峽東厯平
都江水又逕虎鬚灘江水又東逕臨江縣南江水又東

得黃華水口左逕石城南又東至平州又東逕壤塗而
歷和灘又東逕界壇江水又東右得將龜溪口江水又
東會南北集渠江水又東右逕汜溪口江水又東逕石
龍又東逕羊腸虎臂灘江水又東彭水注之江水又東
右逕朐忍縣故城南江水又東逕瞿巫灘江水又逕東
陽灘江水又逕魚腹縣之故陵江水又東為落牛灘逕
故陵北江水又右逕夜清而東歷朝陽道口江水又東
左逕新市里南江水又東右合陽元水口江水又東逕

南鄉峽東逕永安宮南江水又東逕諸葛亮圖壘南江水又東南逕赤岬西江水又東逕魚腹縣故城南江水又東逕廣溪峽西過鄧縣東江水自關東逕弱關捍關南入于沔江水入東烏飛水注之江水又東逕巫縣故城南江水又東巫溪水從北注之江水又東逕巫峽江水歷峽東逕新崩灘江水又東逕石門灘又東過秭歸縣之南江水又東逕城北江水又東南逕夔城南江水又東逕歸鄉縣故城北江水又東逕信陵縣南江水又

東過夷陵縣南江水歷峽東逕宜昌縣之壩竈下江水
又東流頭灘江水又東逕宜昌縣北江水又東逕狼尾
灘而歷人灘江水又東逕黃牛山江水又東逕西陵峽
江水歷禹斷江江水出峽東南流逕故城州江水又東
逕故城北江水又東逕白鹿巖江水又東歷荆門虎牙
之門又東南過夷道縣北夷水從狼山縣南東北注之
江水又東逕上明城北江水又東會沮口又南過江陵
縣南江水又東逕燕尾洲江水又東得馬牧口江水又

東逕江陵縣故城南江水又東逕郢城南江水又東得
豫章口江水又東至華容縣西夏水出焉又東南當華
容縣南湧水出焉江水又東湧水注之江水又逕南平
郡孱陵縣之樂鄉城北又東南油水從西南來注之又
東右合油口又東逕公安縣北江水左會高口江水又
東得故市口江水又右逕楊岐北山大江又東左合子
夏口大江又東左得侯臺水口大江右得龍穴水口江
水自龍巢而東得俞口又東得清揚土塢二口大江又

右逕石首山北又東逕赭要江水左得飯筐上口江水
又右得上檀浦江水又東逕竹畦南又東至長沙下雋
縣北澧水沅水資水合東流注之湘水從東來注之江
水又東左得二夏浦又東逕彭城口江水自彭城巖東
逕如山北江水又左逕白螺山南江水左逕上烏林南
江水又東左得子練口江水左得中陽水口又東得白
沙口江水東右得聶口江水左逕百人山南江水東逕
大軍山南江水又東逕小軍山南江水又東逕雞翅山

北又東北至江夏沙羨縣西北沔水從北來注之江水
又東逕歎父山南對歎州江水又東逕魯山南江水左
得湖口水通太白湖又東合瀉口水上承涑水於安陸
縣而東逕瀟陽縣北東南注于江江水又東湖水自北
南注謂之加吳江右岸頻得二夏浦北對東城洲西浦
側有雍伏戍江之左岸東會龍驤水口出北山蠻中江
之有武口水上通安陸之延頭江水東逕若城南又東
過邾縣南江水右得黎磯北江水又東逕邾縣故城南

鄂縣北江水右得樊口江水又左逕赤鼻山南又東逕西陽郡南郡治即西陽縣也江之右岸有鄂縣故城江水左則巴水注之江水又東逕較縣故城南東會希水口出瀋縣霍山西麓山北有瀋縣故城大江右岸有厭里口安樂浦江水左得赤水浦江水又東逕南陽山南江水又東逕西陵縣故城南江水東歷孟家澆江之右岸有黃石山水逕其北又東過蘄春縣南蘄水從北東注之又東過下雒縣北利水從東陵西南注之又

東左得青林口

青衣水出青衣縣西蒙山東與沫水合也至犍為南安縣入于江

桓水出蜀郡岷山西南行羌中入于南海

若水出蜀郡旄牛徼外東南至故關為若水也南過越雋邛都縣西直南至會無縣淹水東南流注之又東北至犍為朱提縣西瀘江水又東北至犍道縣入于江

沫水出廣柔徼外東南過旄牛縣北又東至越雋靈道

縣出濠山南東北與青衣水合東入于江

延江水出犍為南廣縣又東至牂牁縣東屈北流至巴郡涪陵縣注更始水又東南至武陵酉陽縣入于酉水酉水東南至沅陸縣入于沅

存水出犍為郁郅縣東南至鬱林定周縣為周水又東北至潭中縣注于潭

溫水出牂牁夜郎縣又東至鬱林廣鬱縣為鬱水又東至領方縣東與斤南水合東北入于鬱

淹水出越雋遂久縣徼外東南至靖蛉縣又東過姑復縣南東入于若水

益州葉榆河出其縣北界屈從縣東北流過不韋縣東南出益州界入牂牁郡西隨縣北為西隨水又東出進桑關過交趾麓泠縣北分為五水絡交趾郡中至東界復合為三水東入海

夷水出巴郡復縣江東南過狼山縣南又東過夷道縣北東入于江

油水出武陵孱陵縣西界又東北入于江

澧水出武陵沅縣西歷山東過其縣南又東過零陽縣之北又東過作唐縣北又東至長沙下雋縣西北東入于江

沅水出牂牁且蘭陵為旁溝水又東至鐔城縣為沅水又東北過臨沅縣南又東至長沙下雋縣西北入于江浪水出武陵鐔城縣北界沅水谷南至鬱林潭中縣與鄰水合又東至蒼梧陵縣為鬱溪又東至高要縣為大

水又東至南海番禺縣西分為二其一南入于海其一
又東過縣東南入于海員水又東南一千五百里入南
海

資水出零陵都梁縣路山東北過夫夷縣東北過邵陵
縣之北又東北過益陽縣北又東與沅水合於湖中東
北入于江也

漣水出漣道縣西資水之別又東北過湘南縣南又東
北至臨湘縣西南東入于湘

湘水出零陵始安縣陽海山東北過零陵縣東又東北過洮陽縣東又東北泉陵縣西又東北過重安縣東又東北過鄱縣西秦水從東南來注之又東北過陰山縣西涿水從東南來注之又北過醴陵縣西漉水從東南注之又北過臨湘縣西溜水從縣西北流注之又北為水從西南來注之又北過羅縣西潁水從東來流注之又北過巴陵縣下雋西微水從東來流注之又北至巴丘山入于江

灘水亦出陽海山南過蒼梧荔浦縣又南至廣信縣入于鬱水

淦水出桂陽臨武縣南繞城西北屈東流東至曲江縣安轟邑東屈西南流過滇陽縣出涯浦關與桂水合南入于海

涯水出桂陽縣盧聚東南過含涯縣南出涯浦關為桂水

深水出桂陽盧聚西北過零陵營道縣南又西北過營

浦縣南又西北過泉陵縣西北七里至燕室邪入于湘
鍾水出桂陽南平縣都山北過其縣東又東北過宋渚
亭又北過鍾亭與淮水合又北過魏寧縣之東又東北
入于湘

耒水出桂陽郴縣南山又北過其縣之西又北過便縣
之西又西北過耒陽縣之東又北過鄱縣東北入于湘
沅水出茶陵縣上鄉西北過其縣西又西北過攸縣南
又西北過陰山縣南又西北入于湘

漉水出醴陵縣東漉山西過其縣南屈從縣西西北流至漉浦注入于湘

瀏水出臨湘縣東南瀏陽縣西北過其縣東北與滂溪水合西入于湘

澗水出豫章艾縣西過長沙羅縣之西又西累石山入于湘水

贛水出豫章南野縣西北過贛縣又西北過廬陵縣西又東北石陽縣西又東北過漢平縣南又東北過新淦

縣西又北過南昌縣西又北過彭澤縣西北入于江

廬江水出三天子都北過彭澤縣西北入于江

漸江水出三天子都北過餘杭東入于海

斤江水出交趾龍編縣東北至鬱林領方縣東注二

容容夜緬湛乘牛渚須無無濡營進皇無地零侵黎無

會重瀨夫省無變由蒲王都融勇外此皆出日南郡西

東入于海容容水在南瑩名之以次轉北也右二十水

從江已南至日南郡也


叙禹貢山水澤地所在

泰山為東嶽在泰山博縣西北霍山為南嶽在廬江潯
縣西南華山為西嶽在弘農華陰縣西南雷首山在河
東蒲坂縣東南砥柱在河東大陽縣東河中王屋山在
河東垣曲縣東北也太行山在河內野王縣西北恒山
為北嶽在中山上曲陽縣西北碣石山在遼西臨渝縣
南水中也析城山在河東濩澤縣西南太嶽山在河東
永安縣壺口山在河東北屈縣東南龍門山在河東皮

氏縣西梁山在馮翊夏陽縣西北河上荆山在馮翊懷德縣南岐山在扶風美陽縣西北關山在扶風汧縣之西也隴山終南山博物山在扶風武功縣西南也西頃山在隴西臨洮縣西南蟠冢山在隴西氐道縣之南烏鼠同穴山在隴西首陽縣西南積石在隴西河關縣西南都野澤在武威縣東北合離山在酒泉會水縣東北流沙地在張掖居延縣東北三危山在燉煌縣南朱圉山在天水北冀縣南岷山在蜀郡湔氐道西熊耳山在

弘農廬氏縣東荆山在南郡臨沮縣東北内方山在江夏竟陵縣東北大别山在廬江安豐縣西南外方山崧高是也桐柏山在南陽平氏縣東南陪尾山在江夏安陸縣東北衡山在長沙湘南縣南九江地在長沙下雋縣西北雲夢澤在南郡華容縣之東東陵地在廬江金蘭縣西北敷淺原地在豫章歷陵縣西南彭蠡澤在豫章彭澤縣北中江在丹陽蕪湖南東至會稽陽羨縣入于海震澤在吳縣南五十里北江在毘陵北界東入于

海嶧陽山在下邳縣之西羽山在東海祝其縣南也陶丘在濟陰定陶縣之西南荷澤在定陶縣東雷澤在濟陰城陽縣西北荷水在山陽湖陸縣南蒙山在泰山蒙陰縣西南大野澤在山陽鉅野縣東北大邳地在河南城皋縣北明都澤在梁郡睢陽縣東北益州沱水在蜀郡汶江縣西南其一在郫縣西南皆還入江荊州沱水在南郡枝江縣三澨地在南郡印縣北沱右禹貢山水澤地所在凡六十



稗編卷五十六

欽定四庫全書

子部
稗編卷五十七

詳校官中書臣賈錢

主事臣祁韻士覆勘

總校官中書臣朱鈐

校對官庶言士臣何思鈞

謄錄監生臣袁文宿

欽定四庫全書

稗編卷五十七

明 唐順之 撰

諸家十五

地理

前漢地理志

班 固

凡民函五常之性而其剛柔緩急音聲不同繫水土之風氣故謂之風好惡取舍動靜亡常隨君上之情欲故謂之俗孔子曰移風易俗莫善於樂言聖王在上統理人倫必移其本而易其末此混同天下一之庠中和然

後王化教成也漢承百王之末國土變改人民遷徙成
帝時劉向畧言其域分丞相張禹使屬潁川朱贛條其
風俗猶未宣究故輯而論之終其本末著于篇秦地於
天官東井輿鬼之分野也其界自弘農故關以西京兆
扶風馮翊北地上郡西河安定天水隴西南有巴蜀廣
漢犍為武都西有金城武威張掖酒泉敦煌又西南有
牂牁越雋益州皆宜屬焉秦之先曰柏益出自帝顓頊
堯時助禹治水為舜朕虞養育草木鳥獸賜姓嬴氏歷

夏殷為諸侯至周有造父善馭習馬得華駟綠耳之乘
幸于穆王封于趙城故更為趙氏後有非子為周孝王
養馬汧渭之間孝王曰昔伯益知禽獸子孫不絕迺封
為附庸邑之于秦今隴西秦亭秦谷是也至玄孫氏為
莊公破西戎有其地子襄公時幽王為犬戎所敗平王
東遷雒邑襄公將兵救周有功賜受邠鄠之地列為諸
侯後八世穆公稱伯以河為竟十餘世孝公用商君制
轅田開阡陌東雄諸侯子惠公初稱王得上郡西河孫

昭王開巴蜀滅周取九鼎昭王曾孫政并六國稱皇帝
負力怙威燔書阮儒自任私智至于胡亥天下畔之故
秦地於禹貢時跨雍梁二州詩風兼秦幽兩國昔后稷
封篠公劉處豳大王徙郊文王作鄴武王治鎬其民有
先王遺風好稼穡務本業故豳詩言農桑衣食之本甚
備有鄠杜竹林南山檀栢號稱陸海為九州膏腴始皇
之初鄭國穿渠引涇水溉田沃野千里民以富饒漢興
立都長安徙齊諸田楚昭屈景及諸功臣家于長陵後

世世徙吏二千石高訾富人及豪傑并兼之家於諸陵
蓋亦以彊幹弱支非獨為奉山園也是故五方雜厝風
俗不純其世家則好禮丈富人則商賈為利豪傑則游
俠通姦瀕南山近夏陽多阻險輕薄易為盜賊常為天
下劇又郡國輻湊浮食者多民去本就末列侯貴人車
服僭上衆庶放效羞不相及嫁娶尤崇侈靡送死過度
天水隴西山多林木民以板為室屋及安定北地上郡
西河皆迫近戎狄修習戰備高上氣力以射獵為先故

秦詩曰在其板屋又曰王于興師修我甲兵與子偕行
及車麟四載小戎之篇皆言車馬田狩之事漢興六郡
良家子選給羽林期門以材力為官名將多出焉孔子
曰君子有勇而亡誼則為亂小人有勇而亡誼則為盜
故此數郡民俗質木不恥寇盜自武威以西本匈奴昆
邪王休屠王地武帝時攘之初置四郡以通西域隔絕
南羌匈奴其民或以關東下貧或以報怨過當或以諄
逆亡道家屬徙焉習俗頗殊地廣民稀水草宜畜牧故

涼州之畜為天下饒保邊塞二千石治之咸以兵馬為
務酒禮之會上下通焉吏民相親是以其俗風雨時節
穀糴常賤少盜賊有和氣之應賢於內郡此政寬厚吏
不苛刻之所致也巴蜀廣漢本南夷秦并以為郡土地
肥美有江水沃野山林竹木疏食果實之饒南賈滇甓
僮西近邛笮馬旄牛民食稻魚亡凶年憂俗不愁苦而
輕易淫佚柔弱褊阨景武間文翁為蜀守教民讀書法
令未能篤信道德反以好文刺譏賢慕權執及司馬相

如游宦京師諸侯以文辭顯於世鄉黨慕循其迹後有
王褒嚴遵揚雄之徒文章冠天下繇文翁倡其教相如
為之師故孔子曰有教無類武都地雜氐羌及犍為牂
牁越雋皆西南外夷武帝初開置民俗畧與巴蜀同而
武都近天水俗頗似焉故秦地天下三分之一而人衆
不過什三然量其富居什六秦幽吳札觀樂為之歌秦
曰此之謂夏聲夫能夏則大大之至也其周舊乎自井
十度至柳三度謂之鶉首之次秦之分也魏地背鵬參

之分野也其界自高陵以東盡河東河內南有陳留及汝南之召陵潁彊新汲西華長平潁川之舞陽郕許雋陵河南之開封中牟陽武酸棗卷皆魏分也河內本殷之舊都周既滅殷分其畿內為三國詩風邶鄘衛國是也邶以封紂子武庚鄘管叔尹之衛蔡叔尹之以監殷民謂之三監故書序曰武王崩三監畔周公誅之盡以其地封弟康叔號曰孟侯以夾輔周室遷邶鄘之民于維維邑故邶鄘衛三國之詩相與同風邶詩曰在浚之下

鄘曰在浚之郊邶又曰亦流于淇河水洋洋鄘曰送我淇上在彼中河衛曰瞻彼淇澳河水洋洋故吳公子札聘魯觀周樂聞邶鄘衛之歌曰美哉淵乎吾聞康叔之德如是是其衛風乎至十六世懿公無道為狄所滅齊桓公帥諸侯伐狄而更封衛於河南曹楚丘是為文公而河內殷墟更屬于晉康叔之風既歇而紂之化猶存故俗剛彊多豪傑侵奪薄恩禮好生分河東土地平易有鹽鐵之饒本唐堯所居詩風唐魏之國也周武王子

唐叔在母未生武王夢帝謂已曰余名而子曰虞將與之唐屬之參及生名之曰虞至成王滅唐而封叔虞唐有晉水及叔虞子變為晉侯云故參為晉星其民有先王遺教君子深思小人儉陋故唐詩蟋蟀山樞葛生之篇曰今我不樂日月其邁宛其死矣他人是媮百歲之後歸于其居皆思奢儉之中念死生之慮吳札聞唐之歌曰思深哉其有陶唐氏之遺民乎魏國亦姬姓也在晉之南河曲故其詩曰彼汾一曲寘諸河之側自唐叔

十六世至獻公滅魏以封大夫畢萬滅耿以封大夫趙夙及大夫韓武子食采於韓原晉於是始大至於文公伯諸侯尊周室始有河內之土吳札聞魏之歌曰美哉汾風乎以德輔此則明主也文公後十六世為韓魏趙所滅三家皆自立為諸侯是為三晉趙與秦同祖韓魏皆姬姓也自畢萬後十世稱侯至孫稱王徙都大梁故魏亦號為梁七世為秦所滅周地柳七星張之分野也今之河南雒陽穀城平陰偃師鞏緱氏是其分也昔周

公營雒邑以為在于土中諸侯蕃屏四方故立京師至
幽王淫亂姒以滅宗周子平王東居雒邑其後五伯更
帥諸侯以尊王室故周於三代最為長久八百餘年至
於赧王乃為秦所兼初雒邑與宗周通封畿東西長而
南北短短長相覆為千里至襄王以河內賜晉文公又
為諸侯所侵故其分地小周人之失巧偽趨利貴財賤
義高富下貧憚為商賈不好仕宦自柳三度至張十二
度謂之鶉火之次周之分也韓地角亢氐之分野也韓

分晉得南陽郡及潁川之父城定陵襄城潁陽潁陰長社陽翟郟東接汝南西接弘農得新安宜陽皆韓分也及詩風陳鄭之國與韓同星分焉鄭國今河南之新鄭本高辛氏火正祝融之墟也及成皐滎陽潁川之崇高陽城皆鄭分也本周宣王弟友為周司徒食采於宗周畿內是為鄭鄭桓公問於史伯曰王室多故何所可以逃死史伯曰四方之國非王母弟甥舅則夷狄不可入也其濟洛河潁之間乎子男之國虢鄆為大恃勢與險

崇侈貪冒君若寄帑與賄周亂而敝必將背君君以成
周之衆奉辭伐罪亡不克矣公曰南方不可乎對曰夫
楚重黎之後也黎為高辛氏火正昭顯天地以生柔嘉
之材姜嬴荊芊實與諸姬代相干也姜伯夷之後也嬴
伯益之後也伯夷能禮於神以佐堯伯益能儀百物以
佐舜其後皆不失祠而未有興者周衰將起不可偪也
桓公從其言乃東寄帑與賄虢鄩受之後三年幽王敗
桓公死其子武公與平王東遷卒定虢鄩之地右維左

沛食漆洧焉土陋而險山居谷汲男女亟聚會故其俗
淫鄭詩曰出其東門有女如雲又曰漆與洧方濯濯兮
士與女方秉菅兮恂盱且樂惟士與女伊其相譖此其
風也吳札聞鄭之歌曰美哉其細已甚民弗堪也是其
先亡乎自武公後二十三世為韓所滅陳國今淮陽之
地陳本太昊之墟周武王封舜後妯滿於陳是為胡公
妻以元女太姬婦人尊貴好祭祀用史巫故其俗巫鬼
陳詩曰坎其擊鼓宛丘之下亡冬亡夏值其鷺羽又曰

東門之粉宛丘之栩子仲之子婆娑其下此其風也吳
札聞陳之歌曰國無主其能久乎自胡公後二十三世
為楚所滅陳雖屬楚於天文自若其故潁川南陽本夏
禹之國夏人尚忠其敝鄙朴韓自武子後七世稱侯六
世稱王五世而為秦所滅秦既滅韓徙天下不軌之民
於南陽故其俗夸奢上氣力好商賈漁獵藏匿難制御
也宛西通武關東受江淮一都之會也宣帝時鄭弘召
信臣為南陽太守治皆見紀信臣勸民農桑去末歸本

郡以殷富潁川韓都士有申子韓非刻害餘烈高士宦
好文法民以貪遴爭訟生分為失韓延壽為太守先之
以敬讓黃霸繼之教化大行獄或八年無重罪囚南陽
好商賈召父富以本業潁川好爭訟分異黃韓化以篤
厚君子之德風也小人之德草也信矣自東井六度至
亢六度謂之壽星之次鄭之分野與韓同分趙地昴畢
之分野趙分晉得趙國北有信都真定常山中山又得
涿郡之高陽鄭州鄉東有廣平鉅鹿清河河間又得渤

海郡之東平舒中邑文安東州成平章武河以北也南至浮水繁陽內黃斥丘西有太原定襄雲中五原上黨本韓之別郡也遠韓近趙後卒降趙皆趙分也自趙夙後九世稱侯四世敬侯徙都邯鄲至曾孫武靈王稱王五世為秦所滅趙中山地薄人衆猶有沙丘紂淫亂餘民丈夫相聚遊戲悲歌忼慨起則椎剽掘冢作姦巧多弄物為倡優女子彈絃跕躑游媚富貴徧諸侯之後宮邯鄲北通燕涿南有鄭衛漳河之間一都會也其土廣

俗雜大率精急高氣勢輕為姦太原上黨又多晉公族
子孫以詐力相傾矜夸功名報仇過直嫁娶送死奢靡
漢興號為難治常擇嚴猛之將或任殺伐為威父兄被
誅子弟怨憤至告訐刺史二千石或報殺其親屬鍾代
石北迫近胡寇民俗慙怯好氣為姦不事農商自金晉
時已患其剽悍而武靈王又益厲之故冀州之部盜賊
常為他州劇定襄雲中五原本戎狄地頗有趙齊衛楚
之徒其民鄙朴少禮文好射獵鴈門亦同俗于天文別

屬燕燕地尾箕分野也武王定殷封召公於燕其後三十六世與六國俱稱王東有漁陽右北平遼西遼東西有上谷代郡鴈門南得涿郡之易容城范陽北新城故安涿縣良鄉新昌及渤海之安次皆燕分也樂浪玄菟亦宜屬焉燕稱王十世秦欲滅六國燕王太子丹遣勇士荊軻西刺秦王不成而誅秦遂舉兵滅燕薊南通齊趙勃碣之間一都會也初太子丹賓養勇士不愛後宮美女民化以為俗至今猶然賓客相過以婦侍宿嫁娶

之夕男女無別反以為榮後稍頗止然終未改其俗愚
悍少慮輕薄無威亦有所長敢於急人燕丹遺風也上
谷至遼東地廣民稀數被胡寇俗與趙代相類有漁鹽
棗栗之饒北隙烏丸夫餘東賈真番之利玄菟樂浪武
帝時置皆朝鮮濊貉句驪蠻夷殷道衰箕子去之朝鮮
教其民以禮義田蚕織作樂浪朝鮮民犯禁八條相殺
以當時償殺相傷以穀償相盜者男没入為其家奴女
子為婢欲自贖者人五十萬雖免為民俗猶羞之嫁取

無所讐是以其民終不相盜無門戶之閉婦人貞信不
淫辟其田民飲食以籩豆都邑頗放效吏及內郡賈人
往往以杯器食郡初取吏於遼東吏見民無閉藏及賈
人往者夜則為盜俗稍益薄今於犯禁寢多至六十餘
條可貴哉仁賢之化也然東夷天性柔順異於三方之
外故孔子悼道不行設浮於海欲居九夷有以也夫樂
浪海中有倭人分為百餘國以歲時來獻見云自危四
度至斗六度謂之析木之次燕之分也齊地虛危之分

野也東有甾川東萊琅邪高密膠東南有泰山城陽北
有千乘清河以南勃海之高樂高城重合陽信西有濟
南平原皆齊分也少昊之世有爽鳩氏虞夏時有季荊
湯時有逢公柏陵殷末有薄姑氏皆為諸侯國此地至
周成王時薄姑氏與四國共作亂成王滅之以封師尚
父是為太公詩風齊國是也臨甾名營丘故齊詩曰子
之營兮遭我虋壤之間兮又曰蒺藜我於著乎而此亦其
舒緩之體也吳札聞齊之歌曰泱泱乎大風也哉其太

公乎國未可量也古有分土無分民太公以齊地負海
舄鹵少五穀而人民寡迺勸以女工之業通漁鹽之利
而人物輻湊後十五世桓公用管仲設輕重以富國合
諸侯成伯功身在陪臣而取三歸故其俗彌侈織作冰
紈綺繡純麗之物號為冠帶衣履天下初太公治齊脩
道術尊賢智賞有功故至今其土多好經術矜功名舒
緩闊達而足智其失夸奢朋黨言與行謬虛詐不情急
之則離散緩之則放縱始桓公兄襄公淫亂姊妹不

嫁於是令國中民家長女不得嫁名曰巫兒為家主祠
嫁者不利其家民至今以為俗痛乎道民之道可不慎
哉昔太公始封周公問何以治齊太公曰舉賢而上功
周公曰後世必有篡殺之臣其後二十九世為彊臣田
和所滅而和自立為齊侯初和之先陳公子完有罪來
奔齊齊桓公以為大夫更稱田氏九世至和而篡齊至
孫威王稱王五世為秦所滅臨淄海岱之間一都會也
其中具五民云魯地奎婁之分野也東至東海南有泗

水至淮得臨淮之下相睢陵僮取慮皆魯分也周興以少昊之墟曲阜封周公子伯禽為魯侯以為周公主其民有聖人之教化故孔子曰齊一變至于魯魯一變至于道言近正也瀕洙泗之水其民涉渡幼者扶老而代其任俗既益薄長老不自安與幼少相讓故曰魯道衰洙泗之間斷斷如也孔子閔王道將廢迺修六經以述唐虞三代之道弟子受業而通者七十有七人是以其民好樂上禮義重廉恥周公始封太公問何以治魯周

公曰尊尊而親親太公曰後世寢弱矣故魯自文公以後祿去公室政在大夫季氏逐昭公陵夷微弱三十四世而為楚所滅然本大國故自為分野今去聖久遠周公遺化銷微孔氏庠序衰壞地陋民衆頗有桑麻之業無林澤之饒俗儉嗇愛財趨商賈好訾毀多巧偽喪祭之禮文備實寡然其好學猶愈于他俗漢興以來魯東海多至卿相東平須昌壽張皆在濟東屬魯非宋地也當考宋地房心之分野也今之沛梁楚山陽濟陰東平

及東郡之須昌壽張皆宋分也周封微子於宋今之睢陽是也本陶唐氏火正閼伯之墟也濟陰定陶詩風曹國也武王封弟叔振鐸於曹其後稍大得山陽陳留二十餘世為宋所滅昔堯作游成陽舜漁雷澤湯止于亳故其民猶有先王遺風重厚多君子好稼穡惡衣食以致畜藏宋自微子二十餘世至景公滅曹滅曹後五世亦為齊楚魏所滅參分其地魏得其梁陳留齊得其濟陰東平楚得其沛故今之楚彭城本宋也春秋經曰圍

宋彭城宋雖滅本大國故自為分野沛楚之失急疾顯已地薄民貧而山陽好為姦盜衛地營室東壁之分野也今之東郡及魏郡黎陽河內之野王朝歌皆衛分也衛本國既為狄所滅文公徙楚丘三十餘年子成公徙於帝丘故春秋經曰衛遷于帝丘今之濮陽是也本顯項之墟故謂之帝丘夏后之世昆吾氏居之成公後十餘世為韓魏所侵盡亡其旁邑獨有濮陽後秦滅濮陽置東郡徙之於野王始皇既并天下猶獨置衛君二世

時乃廢為庶人凡四十世九百年最後絕故獨為分野
衛地有桑間濮上之阻男女亦亟聚會聲色生焉故俗
稱鄭衛之音周末有子路夏育民人慕之故其俗剛武
上氣力漢興二千石治者亦以殺戮為威宣帝時韓延
壽為東郡太守承聖恩崇禮義尊諫爭至今東郡號善
為吏延壽之化也其失頗奢靡嫁娶送死過度而野王
好氣任俠有濮上風楚地翼軫之分野也今之南郡江
夏零陵桂陽武陵長沙及漢中汝南郡盡楚分也周成

王時封文武先師鬻熊之曾孫熊繹於荊蠻為楚子居
丹陽後十餘世至熊達是為武王寢以彊大後五世至
嚴王總帥諸侯觀兵周室并吞江漢之間內滅陳魯之
國後十餘世頃襄王東徙于陳楚有江漢川澤山林之
饒江南地廣或火耕水耨民食魚稻以漁獵山伐為業
果蓏羸蛤食物常足故眚窳偷生而亡積聚飲食還給
不憂凍饑亦無千金之家信巫鬼重淫祀而漢中淫失
枝柱與巴蜀同俗汝南之別皆急疾有氣勢江陵故郢

都西通巫巴東有雲夢之饒亦一都會也吳地斗分野也今之會稽九江丹陽豫章廬江廣陵六安臨淮郡盡吳分也殷道既衰周太王亶父興郊梁之地長子太伯次曰仲雍少曰公季公季有聖子昌太王欲傳國焉太伯仲雍辭行采藥遂奔荆蠻公季嗣位至昌為西伯受命而王故孔子美而稱曰太伯可謂至德也已矣三以天下讓民無得而稱焉謂虞仲夷逸隱居放言身中清廢中權太伯初奔荆蠻荆蠻歸之號曰句吳太伯卒仲

雍立至曾孫周章而武王克殷因而封之又封周章弟
中於河北是為北吳後世謂之虞十二世為晉所滅後
二世而荆蠻之吳子壽夢盛大稱王其少子則季札有
賢材兄弟欲傳國札讓而不受自太伯壽夢稱王六世
闔廬舉伍子胥孫武為將戰勝攻取興伯名於諸侯至
于夫差誅子胥用宰嚭為粵王句踐所滅吳粵之君皆
好勇故其民至今好用劍輕死易發粵既滅吳後六世
為楚所滅後秦又擊楚徙壽春至子為秦所滅壽春合

肥受南北湖皮革鮑木之輸亦一都會也始楚賢臣屈原被讒放流作離騷諸賦以自傷悼後有宋玉唐勒之屬慕而述之皆以顯名漢興高祖王兄子濞於吳招致天下之娛游子弟枚乘鄒陽嚴夫子之徒興於文景之際而淮南王安亦都壽春招賓客著書而吳有嚴助朱買臣賢顯漢朝文辭並發故世傳楚辭其失巧而少信初淮南王異國中民家有女者以待游士而妻之故至今多女而少男本吳粵與楚接比數相并兼故民俗畧

同吳東有海鹽章山之銅三江五湖之利亦江東之一都會也豫章出黃金然堇堇物之所有取之不足以更費江南卑濕丈夫多天會稽海外有東鯢人分為二十餘國以歲時來獻見云粵地牽牛婺女之分野也今之蒼梧鬱林合浦交趾九真南海日南皆粵分也其君禹後帝少康之庶子云封於會稽文身斷髮以避蛟龍之害後二十世至句踐稱王與吳王闔廬戰敗之攜李夫差立句踐乘勝復伐吳吳大破之棲會稽臣服請平後

用范蠡大夫種計遂伐滅吳兼并其地渡淮與齊晉諸侯會致貢於周周元王使使賜命為伯諸侯畢賀後五世為楚所滅子孫分散君服于楚後十世至閩君搖佐諸侯平秦漢興復立搖為越王是時秦海南尉趙佗亦自王傳國至武帝時盡滅以為郡云處近海多犀象璚瑁珠璣銀銅果布之湊中國往商賈者多取富焉番禺其一都會也自合浦徐聞南入海得大州東西南北方千里武帝元封元年畧以為儋耳珠厓郡民皆服布如

單被穿中央為貫頭男子耕農種禾稻紵麻女子桑蠶織績亡馬與虎民有五畜山多麋廩兵則矛盾刀木弓弩竹矢或骨為鏃自初為郡縣吏卒中國人多侵陵之故率數歲一反元帝時遂罷棄之自日南障塞徐聞合浦船行可五月有都元國又船行可四月有邑廬沒國又船行可二十餘日有諶離國步行可十餘日有夫甘都廬國自夫甘都廬國船行可二月餘有黃支國民俗畧與珠厓相類其州廣大戶口多多異物自武帝以來

皆獻見有譯長屬黃門與應募者俱入海市明珠璧流
離奇石異物齎黃金雜繒而往所至國皆稟食為耦蠻
夷賈船轉送致之亦利交易剽殺人又苦逢風波溺死
不者數年來還大珠至圍二寸以下平帝元始中王莽
輔政欲耀威德厚遺黃支王令遣使獻生犀牛自黃支
船行可八月到皮宗船行可二月到日南象林界云黃
支之南有已程不國漢之譯使自此還矣

周道畧摠叙

一統志

道周天下八極殊塗水陸畢會交合于衢地故北惟開
封南惟應天為水陸之大都會應天東南浮馳至于鎮
江自鎮南浮貫常達蘇左沿松右泛湖南由嘉興以抵
于杭惟杭逆浙經嚴及于金華東陟于處西及衢趨于
廣信及建寧至迤平西馳邵汀東經福興泉極于漳惟
杭渡浙紹寧台溫會于處應天西南浮馳並會于嶽厥
馳太平過和廬趨黃渡武駐于嶽厥浮太平南及寧國
徽廣德北及和廬西經池安慶九江歷黃州武昌會馳

于歛惟九江南浮南康東及饒廣信以通浙閩南經南昌東及撫州建昌西及瑞南經臨江西及袁南經吉安贛南安過梅嶺歷南雄韶于廣州厥東浮馳歷惠並抵于潮南經肇慶高及于雷西趨于海由雷泛海極于瓊惟武昌西北逆由漢陽沔陽安陸以達于襄陽惟嶽西浮由荆達歸以及于夔南及施州衛西經涪南及黔西經重慶北及順慶保寧馳于成都西經瀘南及永寧趨于烏撒會于曲靖西經叙州嘉定由眉至于成都惟嶽

西南浮馳常德歷辰沅思並至于思南北馳及播直走
貴州歷安順鎮寧永寧普安會于曲靖以抵雲南西北
及武定東南及廣西廣南南及臨安江西南經楚雄北
及姚安經趙州南及景東北及大理鶴慶麗江經蒙化
極于金齒惟岳南浮長沙西及寶慶南至衡東及彬南
歷永全桂林惟桂林西北浮柳厭西北達于慶遠厭西
及于田州泗城惟桂林南經平樂梧潯南寧太平抵于
思明開封東南浮馳抵淮浮由鳳陽以達于淮馳自歸

德以至于淮之宿自淮而北浮馳並抵于燕浮于徐究
以達東昌暨德過澗由通抵燕厥馳徐究東及濟南過
東昌至河間以駐于燕自淮而南浮馳並至于應天厥
馳自鳳陽以至厥浮由揚以達惟茲淮安乃為南北之
交衝自淮東馳西及于清通濟南直走萊登泛海亦抵
于遼陽開封東北馳于衛彰廣平順德經真保至于燕
惟燕東馳永平北極大寧又東極于遼東北極于開平
又西北抵于軍府開封西北至關暨懷慶歷澤潞沁東

及遼西及于汾平陽與蒲經太原東及平定州西及岢嵐經代西及朔經大同抵于蔚開封又西北自河南至西安北及延安經邠北及慶陽至夏經平涼西及鞏昌惟鞏昌西北馳于臨洮河州衛西南馳于岷洮經蘭州莊浪西及西寧經涼州至永昌山以極于甘肅惟西安西南經鳳翔漢中歷保寧潼川西北及于龍州西南至于成都西北經茂州以極于松藩西南及雅黎歷邛部建昌至于會川東南馳于重慶以通川江

三都論

章俊卿

後同

自古帝王之作莫不更都三河之間而周秦以降繼宅
兩京五季而下又都大梁何帝居之不常也然考其所
以定都改卜之意則有由矣大抵長安便於守洛陽便
于利大梁便于戰三京利害各有一偏故前王因其便
利而都之也方其正朔雖一而利勢不專藩侯棋布山
河瓜分列國有唇齒之依朝廷無指臂之順必也守戰
並修軍民兩恤俾其進足以制諸侯之變退足以保固

宗社捨長安莫利也故宗周西漢繼宅西土勢或然也
嬴秦隋唐踵卜長安仍以為安也逮夫車書混一禮教
興行舉綱朝廷張目郡縣於是偃武修文輕徭薄賦俾
斯民均受其賜思所以新一王之制侔盛古之隆唯禮
樂教化是遑而不以兵革戰伐為事則捨洛陽莫便也
故周成漢光定都成周誠得其宜也曹魏司馬晉踵卜
洛邑仍以為安也光武而下唯元魏孝文僅留意于稽
古禮文之事故遠拔乎代中宅洛邑粲然新一王之政

遠侔盛古亦遷都改卜有以相之若乃版圖未一侵伐
鼎來夷狄外訐邊隅僭竊必也德刑兼脩戰守兩備宿
重兵於京師彊幹弱枝以鎮服夷夏而指蹤英雄以赴
其功則捨大梁莫便也朱梁而下以迄于宋仍都大梁
亦勢或然也然有其利必有其害膏腴惰農險阻逸德
如禦侮于海隅而忽艱虞於京輦者長安之不利也故
五侯九伯不能亂周而犬戎實亂之山東戰國不能亡
秦而趙高實亡之藩狄不能犯函谷而王莽實篡漢燕

晉不能隳符秦而姚萇實代堅以至輔民課而新莽燼
涇師繞而德宗逃豈非長安忘警戒之道也歟德化有
時替而君不常明紀綱有時紊而政不常舉敵受八面
而險不數舍一方矯虔九重震動此則洛邑之不利也
在董卓奮而東漢亡爾朱騁而北朝亂偏師犯闕如履
門闌以至興午失馭藩侯弄兵往來如織王城不啻傳
舍豈非洛陽失守戰之備也歟宴安起於無虞弊蠹生
於悠久故載戢載橐而甲械朽鈍以安以處而士卒獐

備兵多難用將逸難使可以隆安彊之威而不足以禦
一旦之變此則汴都之不利也故石晉之亡兵叛于外
也宋朝靖康之變太平之久也然則長安便于守洛陽
便于利大梁便于戰又在人之所便利如何固未可恃
其所便而遽即于安也雖然玉京之制各有輔車屏蔽
之地又不可不察長安之制以陝西為畿輔而屏蔽實
在隴右宋朝失於西夏洛陽之制以關東為畿輔而屏
蔽實在河東大梁之制以河南為畿輔而屏蔽實在河

北故由古以來洛京之禍常起于并汾汴都之變常起於燕趙長安之難雖不常所自而河隴之寇尤為頻駭良由失其外屏也是以河湟未歸則長安未易都雲朔未賓則洛陽未易卜燕薊未服則大梁未易宅唇亡齒寒者此之謂矣由是以論則三京利害各有攸當不可一槩求也然以王道繩之是不無優劣焉從古議者紛紛莫不以長安為優而臣意則否長安之地四塞雖固而包履裁一心之境八州之民皆吾赤子而乃墮潼峽

以自固是何示天下以私也豈天子守在四夷而王者
以天下為家之義哉嗚呼天生民而立之君所以均調
而齊一之也故王者之作必中天下而立定四海之民
俾其貢賦於是而易輸寃抑於是而易訴朝覲會同於
是而易期赴調上計於是而易達故布德行仁則易以
均被發號施令則易以敷暢皆所以均惠斯民也若夫
洛邑之地當天下之中大梁坐水陸之衝其所以惠利
斯民孰便於此傳曰譬如北辰居其所而衆星拱之洛

邑之謂也又曰三十輻共一轂大梁之謂也然則欲求一室萬世之都所以為國家生民無窮之計三都之中邛洛其庶幾矣

論大梁可都

臣聞世之議者皆以謂天下之形勢莫如雍其次莫如周至於梁則天下之衝而已非形勢之地也故漢唐定都皆在周雍至五季已來實始都梁本朝縱未能遠規長安盍亦近卜於洛陽乎而安土重遷眷眷於開封之

境非所以為萬世計也臣竊以為不然何則漢唐之都
必於周雍本朝之都必於梁而後可也夫長安之地左
穀函右隴蜀襟屏終南太華之山縈帶涇渭洪河之水
地方數千里皆膏腴沃野卒有急百萬之衆可具形勢
便利下兵於諸侯如建瓴水四塞之國也故其地利守
自古號為天府開封地平四出諸道輻輳南與楚境西
與韓境北與趙境東與齊境無名山大川之限而汴蔡
諸水參貫巾車錯轂蹄踵交道軸輜銜尾千里不絕四

通五達之郊也故其地利戰自古號為戰場洛陽左纏
右澗表裏山河扼穀黽之隘阻成臯之險直伊闕之固
廣袤六百里四面受敵以守則不如雍以戰則不如梁
然雍得之可以為重自古號為天下咽喉凡天下之形
勢無過此三者也故彼蜀之成都吳之建業皆霸據一
方之具而楚之彭城特盜賊之窟耳易曰天險不可升
也地險山川丘陵也王公設險以守其國所謂險者豈
必山川丘陵之謂哉在天而不可升在人而不可奪則

皆為險矣夫雍為天府梁為戰場周為天下之咽喉而臣以謂漢唐之都必於周雍本朝之都必於梁而後可者漢唐以地為險本朝以兵為險故也漢高祖曰吾以羽檄召天下兵莫有至者武帝曰吾初即位不欲出虎符發兵郡國背道材官有變則以符檄發之京師惟有南北兩軍有期門羽林孤兒以備扈從唐分天下為十道置兵六百三十四府其在關中者惟二百六十有一府府兵廢始置神策為禁軍亦不過數萬人以此見唐

漢之兵皆在外也故非四塞之國則不足以制海內之命此所謂以地為險者也本朝懲五季之弊舉天下之兵宿於京師名挂於籍者號百餘萬而衣食之給一毫已上皆仰縣官又非若府兵之制一寓之於農也非都四通五達之郊則不足以養天下此所謂以兵為險者也夫以兵為險者不可以都周雍猶以地為險者不可以都梁也而昧者乃以梁不如周周不如雍嗚呼亦不達于時變矣夫大農之家建田阡陌積粟萬斛兼陂池

之利并林麓之饒則其居必卜於郊野大賈之室歛散
金錢以逐十一之利出納百貨以收倍稱之息則其居
必卜於市區何則所操之術殊則所托之地異也今梁
據天下之衝歲漕東南六百萬斛以給軍食猶恐不贍
矧欲襲漢唐之迹而都周雍之墟何異大賈之術而欲
托大農之地也由是言之彼周雍之地者漢唐之險耳
本朝何賴焉

論金陵

蘇伯衡

蘇子曰初國家建朝廷郊廟社稷于南京徵郡國為陰陽之學者各以其術來議至者數百人館于上賓館館之副使劉迪簡者江右人蓋通地理之術云一日迪簡故問諸陰陽之師曰觀綿之詩書之殷盤周誥孔子之語曾參則古人之為宮室城郭若治地而葬亦惟以卜用龜而已陰陽家者出始不受命于鬼神而至用其精鑒絕識可謂難能也已而其書至于今為其學者守之篇目繁多安所折衷邪曰諸家之書莫切于錦囊之內

外篇內外篇中莫要於乘生氣之一語曰生氣烏乎見
曰于山川之岡隴向背離合逆順見之故夫地氣之聚
者形必勝形之勝者得必吉此地理家法也曰吾於大
河江漢之南北境未嘗盡至北條南條之山川未嘗盡
窺故吾於周秦兩漢魏晉唐宋之餘墟未暇具論姑言
金陵秦始皇至埋金以鎮之諸葛亮以為帝王之宅則
其氣之聚也形之勝也有吉而無凶也不待言而知也
而其江山吾與諸公共睹焉前此國其間者曰東晉曰

宋曰齊曰梁曰陳曰南唐其國之所建雖異地其地之相去初甚近而其歷年或久或近則大相遠何也曰此非有得失於生氣然哉曰得者久而失者近信耶何為其久者亦僅僅百餘年而已耶地理之術行于天下久矣而建國又大事也彼六代之君不擇其人而聽其相度焉人之見擇於六代之君者不竭其目力技能以效用焉豈其情乎擇人以相度竭目力技能以效用而微應不可與周之卜世卜年同日而語吾以故惑焉是

有出于形勢也則已使無出于形勢也可不考其故與
曰昔之冠蓋之聚今之桑麻之場也畚鍤之相尋塹湮
於旦莫非復當時之舊也甚矣雖欲考之得乎曰其地
脉自東南遡長江而西數百里乃止其止也蜿蜒磅礴
既翕復張中脊而下降為平行所謂土中於是乎在西
為鷄籠覆舟諸山又西為石頭城而鍾山峙其東大江
迴抱秦淮玄武湖左右映帶兩淮諸山合皆內向若委
玉帛而朝斯固無改當時之舊觀也豈惟無改乎當時

固無改于開闢之初也氣之聚而形之勝何難知之有則六代所以修短興亡之故豈有不足考者乎且夫氣鍾為吉壤猶氣鍾為鉅賢鉅賢之身既亡清明之氣斯散未有傷其一手一足而是氣之行乎其一身者俱斷喪者也今因一岡一壠之變置而謂一都會舉然豈理也哉曰天運有時而推移風氣亦有時而聚散據有定之形論無窮之變不幾于刻舟而求劍乎是以不敢也曰氣之自聚自散固非人力之所能為歟曰然曰然則

所謂聚之使不散行之使有止者誣耶曰此言乎穴法也四時之運無窮焉及其至也則聚者無不散止者無不往勢之所必至也有聚有散有止有往而地之或吉或凶亦與之俱矣是以雄都大邑名城巨鎮脩焉過之而為坵墟隴畝坵墟隴畝脩焉過之又為名城巨鎮雄都大邑也曰是則宇宙之間山川之形勢不改而其氣無定在其地無常吉也決矣然昔之善為宮宅地形者所留鈐記去之五六百年葬而偶宜其處徵應無不協

則氣未必無定在地未必無常吉也曰蓄泄不同焉曰
寶公指定林寺前獨龍岡謂武帝曰若以為陰宅後當
永久既而寶公示寂武帝以錢二十萬購其地奉真身
寔焉寶天監中也於今八百餘載世運之消息人事之
盛衰亦已屢矣而寶公之光靈振耀猶一日則地之泄
者何如哉地以氣為脈相地以氣為本陰陽家之于地
理未嘗不以藉其口矣夫地之形有方體故其美惡肥
磽蓋有甚于形勢今于其可指見而言傳者猶不能按

以明前代修短興亡之故則於其藏乎地中者果何以盡得之乎時余在坐上遽曰何見之晚也今夫人有一畝之宮欲使人居守猶必慎擇其人之克負荷者斯舉而授之矧金陵之墟王者之都天造而地設不有聖人其肯輕畀之乎彼晉宋齊梁陳南唐之君乘時割裂竊而據之皆非天授既不足當王氣之盛又安能乘生氣之聚余固知天地閔藏其風氣之完厚於數千年之久以待今天子之興而作都也觀前此之國於斯者殫其

智力弗克混合而今鴻業告成朔南為一幅員之廣振
古所無則天意豈不昭乎休哉萬年無疆之業固不待
望氣者而知王氣之鬱葱不必陰陽家而知生氣之克
周也於是諸陰陽師群然和余而迪簡遂不復云其口
雖不言其心終不無惑也

稗編卷五十七